

1st Sem, Unit-I

2. Kokborokni umor bswk wngwiman kok kisabai swidi.

Marks-10

Ans:- Kokborok Tiprasa dophani amani kok. Saimanhorya jorani simino o kok Tiprasa dophani khukbai khugo sajawgi phaio. Phiya kokborokni umor bswk omono twiwi soikhe saimanai kwrwiphano koksoisimung kwrwngrog laibumano rwgwi cherwi naitugwi naiphilwi naaimani bisingtwi saimankha Kokborok kokni umor 1200-1400 bisi wngwimano.

Kokborok kokbai Chinese kokni achaiphangno rwgwi kokbuma:

Koksoisimung kwrwngrogni elembakni rwtwk rwmungno eba naiphilmano rwgwi kokborokno umor chongnani swkang Chinese kokbai Kokborok kokni yaphangmari rutukthai kwlaio. Koksoisimung kwrwngrogni wansukmatwi hayungo 7000 (snisai) wngtwtwi kok tongwimano. O kok bosongo 12-13 hai khwlaiwi khagwi phunukjakkha. Kok soisimung kwrwng Suniti Kumar Chattapadhyay-ni simi Grierson bebakno Tibetan Chinese eba Sino-Tibetan-ni bodo kok bosongo Kokborok kok khopjago hinwi salangkha.

Soisimung kwrwng Tarapurwala Chinese kokno 5000 bisi kwcham hinwi bini swijak "Elements of the Science of Languages" bijabo khursawi salangkha. Koksoisimung kwrwng Dr. Sukumar Sen swilangkha- "Chin kok hayungni jotoni swlai kotorkuk. Chin kokni jotoni kwchamkuk bumul Jisu Khristo achaimani 2000 bisi swkangni kaisa-kwnwio mukumu-swijak kwchamo manjakkha." Chinese kok Kokborok kokni yaphang, aboni bagwino kokborokni bisi Chinese kokbai baksa baksa hinwi romwi naharwimano.

Kailash Chandra Singha-ni Rajmala bijapno rwgwi kokbuma:

Kailash Chandra Singha bini 'Rajmala' bijapni kwrwngsao sakha- bubagwra Sengtungpha ha pusimungni jorao bana tisajakkha tei Tipra bisi chengjakkha. Rajmala' bijapno rwgwi bini ha pusimung jora rabisi chinwi eba aboni kisa swkangdropse hinwimano. Phiya abono tabukni simi 800 bisi swk swkangni laibumase hinwimano. Tiprani bubagwra Ganga twimani salhap rukungo bana tisamani tei Tipra bisi chengjakmani kok bwkwraio kisaswkphano laibumani kok bubak tongkhu hinmani abo tabukni simi 1400 bisi swkangni kok hinwi chongwi naharwimano. Oro khursathai kwlaio Tiprani bubagwra khoroaksa tabukni simi 1400 bisi swkango uttur kacharni bwkhakno yakarwi tabukni Tipra hachuk mulugo happhaikha hinwi sawimankha.

Glottochronology kok elembakno rwgwi kokbuma:

Laibumano rwgwi romwi naharwimano Jisu Khristo achaimani 2000 bisi swkango Bodo, Dimasa, Kokborok, Garu, Mech akorog Assam-o phaiwi jora kolok romwi thansakhe tonglai phaikha.

Glottochronology kok elembakni bisingtwi kaisa tei kaisa kokni achaiphang eba umor romwi naharwimano. Abono twiwi America-ni kok soiswimung kwrwng H.A. Gleason jr. bini mung gwnang "An introduction to Descriptive language" bijapni 450 laio swikha tumung songsa tei songsa bosongni kok 66% solaikhe romwimano kaisa kokbai teikaisa kok 1000 bisi swkang kaklaikha. Tei 44% solaikha hinkhe 2000 bisi swkang kaklaikha hinwi chongwi naharmano. Dimasa kokbai Kokborok kokni 55-60% solaikha hinkhe Glottochronology-no rwgwi naiwi saimankha 1200-1400 bisi swkangno Dimasa kokbai Kokborok kok kaklaikha. Tabuk Glottochronology elebakno rwgwi Kokborok kokni umor 1200-1400 bisi hinwi romwi naharjakkha.